



مى يحيى - بيانولا

مى يحيى سيد سعيد

٢٨ عامًا

محل الإقامة : مدينة الصالحية الجديدة - الإسماعلية

للتواصل :

facebook.com/pages/Heartbeat/2058376

12830108

الإهداء ..

إلى من وهباني الحياة .. أبي وأمي .

إلى بهجة حياتي .. إخوتي .

إلى كل غالٍ من صديقٍ أو قريب .

إلى أرواحٍ فارقت دنياي .

إلى نافذة الأمل .. زحمة كتاب .

إلى كل وجه رغم العناء ما زال مبتسمًا .

أهديكم جميعا : حبي ، إبتسامتي ، وكلماتي (:)

أبو وش بشوش



أبو وش بشوش يديك ضحكة
ويقول لك دائماً إوعى تخاف
وف لحظة ضعفه وخوفه وألمه
يكون شفاف
ويشوف الناس لكن جواه
عمره ما يتشاف

أبو وش بشوش المتفائل
بيجيب الضحكة من الوحلة
ويشد على إيدك ويقول لك
إن اللي هيجي أكيد أحلى
وإن الأيام زي ما صعبة
في غيرها كثير أيام سهلة

أبو وش بشوش تلقاه جانبك
وقت ما تحتاج له يكون صاحب
ف الشدة يداوي ويطبطب
ولفعل الخير دائماً حابب

وف وقت الفرحة تملي معاك
ولا يمكن مرة يكون غايب

أبو وش بشوش دائماً صافي
صعب يجافي وما يتلونش
لو مهما تغيب وقت ما ترجع
هيقابلك بردو بنفس الوش
وإن حب ف يوم يعتب ويلوم
مش محتاج منك غير معلش

أبو وش بشوش لما بيحزن
يختار البعد ويبقى وحيد
ويفضفض مع نفسه ويرجع
ويساعد غيره ويبقى سعيد
يقفل على حزنه بـ ١٠٠ مفتاح
ولا يشكي ولا يقول ويعيد

أبو وش بشوش إنسان عادي
موجود جوايا وجواك
مش محتاج منك تتغير
ولا محتاج منك تبقى ملاك
كل اللي عليك تفضل فاكر
إن الخالق دائماً وياك

يا ثورة ما تمهه



يا حكومة فيها العبر
على كل صنف ولون
مجرم بيتساب حر
وبريء يبات مسجون

ويا قاضي يا محترم
بعث القضية بكام؟!
وبتعمل إيه قل لي
لحظة ما تيجي تنام?!

ويا شيخنا يا مفتي
موطي راسك إيه??
فصل لنا فتوى وافتينا
نعمل إيه !!

وتعالى يا إعلام
يا نزيه يا أبو المبدأ
من كتر ما صدقت كدبك
بيتصدق

أربع سنين عدّوا
واليوم يجر ف يوم
لا شهيد رجع حقه
ولا حرروا مظلوم

منظومة مدروسة
وكل شيء محسوب
وادونا للأحلام
تقرير وفاة مكتوب

يا ثورة ما تمت
يا حلم مات مخنوق
محتاج عشان يرجع
كل العيون دى تفوق

يا حلمي يا وردي
خلوا السواد لونك
حاول تكون عندي
وأنا هعمل إيه بدونك

قفلوا البيبان كلها
إلا ببيان الموت
ممنوع تقول الآه
أو حتى تبكي بصوت

يا بلدي ما تلومينيش
 كان نفسي أرضيكِ
 كان نفسي حتى أعيش
 آمن فـ أرضيكِ

خدوا الأمان والحلم
 والثورة وخدوني
 وبأمر مـ السلطان
 برصاصة قتلوني

شهيد وحلمي شهيد
 وحقوقي منسية
 زي اللي راح قبلي
 واللي يروح بعدي
 وناس كثير تانية

قصائد

كتابة زملاوي

أحمر بلون الدم وأبيض بلون الكفن
 فلان أنا زعلان ، ميت وحلمي اندفن
 جنسيتي مصري وحياتي مالهاش تمن
 مقتول بإيد ضالة ، ف دولة صابها العفن

ريح مكة

أنا المشتاق لريح مكة وشكل ملابس الإحرام
 وأنا العطشان لبيير زمزم ف عز الحر يرويني
 أنا الطمعان أزور بيتك وعلى عرفة يكون لي مكان
 وأنا المحتاج أطوف وأسعى وأقول يا رب قويني
 وأعود لـ الدنيا وكأني يادوب مولود .. يادوب
 حيلتي توبة نصوحة ودمعة طاهرة من عيني